

NKULAN (MAM ZAMBE A NGA KULI YOHANES)

Mejô me ôsu a mebatan

(Amôs 3 : 7 ; Nkul 22 :6-10)

1 1 Nkulane mame Yésus Krist, ñwô Zambe a nga ve nye na a liti bebobisaé bé mam m'ayiane boban ana'ana ; nde a nga liti wô, nlôman a nga lôm éngele wé e be mboésané wé, Yôhanes ; 2 nnye ate a nga kañete mejô me Zambe, a ajô nkañete Yesus Krist, abime mam a nga yen. 3 Môt a lañe nkulane mame wu tyiñ yôp, nnye a ne mvom, nalé fe ba b'awô'ô me a ba'ale mam me ne ntilan été ; amu éyoñ é nto bebé.

4 Ma Yôhanes m'atili bekirke zañbwal be ne Asia : Mvam é bo'o e be mia a mvo'é, bi so'o be nyô a too, nyô a nga too, a nyô a zu, a e be minsisime zañbwal mi ne asu éto njôô jé, 5 a be Yésus Krist, nyô a ne ngaa ya buni, ntôle bewômô miñwuan, asuzo'o bejô bôte ya si nyô.

E be nyô a nye'e bia, nyô a nga kôté bia e mam abé mangan été a metyi mé - 6 ane a nga bo bia ngum éjôé, bepretre e be nyô a ne Zambe a Esaa wé- duma a éwôlô bi bo'o e be nye akekui nnôm éto a (nnôm éto). Amen.

7 Mi lôô, a zu a minkut, a dis ese d'aye yene nye, nalé fe ba be nga jii nye akoñ, a meyoñ mese ya si nyô m'aye yôm amu nye. Yaa, Amen.

8 Ma me ne Alfa a Oméga, nalé Nti a jô ; nyô a too, nyô a nga too, a nyô a a zu, nyô a ne ngul ése.

Nyenane Krist

(Dan 10 :5-12, 14 ; Mat 17 :1, 2)

9 Ma Yôhanes, monyoñe wônan a ébe nyoñe ngabe ya étibela'a a éjôé a mbane njiban, mbie bi né e be Yésus, me mbe ékôte mañ b'aloene na Patmôs été, amu

Rev. Matthias
Secrétaire Général

mejô me Zambe a amu nkañetane ya ya kañete ajô Yésus. 10 Me mbe e Nsisim été e môs Nti, ane me nga wô'ô beta tyiñ e mvuse jam, aval ane nyô toñ, 11 a jô'ô na, Jam w'ayen, tili'i de e kalate a lôme nye e bekirke zañbwale ba : Efésus, a Simirna, a Pergamus, a Tiatira, a Sardes, a Filadelfia, a Laôdikia.

12 Ane me nga veñesan na, me yene tyiñ é nga bo é kobô'ô ma, Nde éyoñ me nga veñesan, me nga yene bitelé belambe bi gôlt zañbwa, 13 a môt éziñ a funa'ane mone môt, a tele ézezañe bitelé belambe, a be'e ayap alô'ô, asese gôlt e tii nye e nkuk. 14 Niô wé a ésile jé bi nga too éfumulu, aval ane éfumulu mevule me ntômba, éfumulu ane fem (*en français: neige*) ; mise mé ke ane nkaba'a nduan, 15 a mebo mé me funa'ane mvot j'angemban, aval ane nge me maneya san e mbe'e nduan été ; a tyiñe jé é mbe aval ane éduñ abui mesôk. 16 A nga bili ateté zañbwal e wo wé ya mbonnôm, a akabe fansoñ e nee meyo mebaé e nga bo e kuii nye anyu ; asu dé e mbe aval ane jôb d'afaé a ngule jé.

17 Nde, éyoñ me nga yene nye, me nga ku nye e mebo si, aval ane mbim. Ane a nga beté ma wo wé ya mbonnôm, a jô na, Te ko woñ. Ma me ne nyô ôsusua, a nyôa mvua, 18 a nyô a vee. Me mbe ñwuan, ve ô lôô, me nto nyô a vee nnôm éto a nnôm éto, a me bili bidiba'a ya awu a bi ya Hadés. 19 Ajô ete, tili'i mam w'ate yen, a ma me né, a ma m'azu boban mvuse valé. 20 Ajô nsolane jam ya ateté zañbwal w'ate yen e wo wom ya mbonnôm, a ajô bitelé belambe bi gôlt zañbwa, ateté zañbwal ete e ne beéngéle ya bekirke zañbwa, a bitelé belambe zañbwale bite bi ne bekirke zañbwa.

Mbañete mfa'a Kirke ya Efésus

(Mat 13 :12 ; 24 :12, 13 ; M.M. 20 :17, 28 - 31 ; Ef 1 :15, 16 ; 5 :2 ; Behéb 6 :10 - 12)

2 1 Môt a bili ateté zañbwal ete e wo wé ya mbonnôm, nyô a wulu ézezañe bitelé belambe bi gôlt zañbwale bite, nnye a jô mam mana, na, 2 M'ayem mimboane miôé a nju'u ésaé wôé, a mbane njibane wôé ; a na, ô se ngule ya jibi mbia be bôt. M'ayem ane ô nga ve'ele ba b'aloene bebien na, minlôman, ve be nji bo mie ; ane ô nga yene be belaa minsos. 3 O ne fe mbane njiban, a ô nga jibi amu jôé dam, ô nji ke tek. 4 Ve me bili wo jame dina na, ô jô'éya nye'ane wôé ya atata'a. 5 Ajô ete, simesa'ane vôm ô nga ku, kôñela'ane nlem,

a bo mimboan ya atata'a. Nge sa nalé, m'aye zu e be wo, a m'aye vaa ételé lambe jôé e vôm é tele, vengevenge ve w'akôñelan nlem. 6 Ve ô bili jame dina na, w'avini mimboane betôñe Nikôlas, mmie mite ma fe m'avini. 7 Môt a bili melo, a wô'ô jam Nsisim w'ajô bekirke. Môt a dañ, m'aye bo nye na, a di bibuma bi élé ényíñ, nje é ne e Paradisa Zambe été.

Mbañete mfa'a Kirke ya Simirna

(Mat 5 :10-12 ; 10 : 22, 39 ; Yak 1 :12 ; I Pét 4 :12, 13)

8 Tili'i fe éngel ya kirke é ne Simirna na,

Nyôa ôsusua a nyôa mvua, nyô a mbe ñwuan ve a beta bo vevee, nnye a jô mam mana na, 9 M'ayem étibela'a jôé a azoé dôé, ve ô too kum. M'ayeme fe nkobô ébiasé ya ba b'aloene bebiene na, Beyude, ve be nji bo be, be ne ve sinagôga Satan. 10 Te ko mam me mbeme ve wo mintaé woñ. O lôô, diable a mbeme wua mia bevok e nda mimbôk, ane mi aye yene meve'ele ; a mi aye tôban étibela'a nté ya melu awôm. O bo'o nyô ya buni akekui awu, nde m'aye ve wo ékat ényíñ. 11 Môt a bili melo, a wô'ô jam Nsisim w'ajô bekirke. Môt a dañ, awu baa d'aye ke ndamane nye.

Mbañete mfa'a Kirke ya Pergamus

(Yes 11 : 4 ; 2 Tés 1 :4, 5 ; 2 Yôh 7-11 ; Yuda 3, 4, 11)

12 Tili'i fe éngel ya kirke é ne e Pergamus na,

Nyô a bili akabe fansoñ e nee meyo mebaé nnye a jô mam mana na, 13 M'ayeme vôm ô too, vôm éto njôô Satan é né. O bili jôé dam ne zeñ, a ô nga bo te kate mbunane wom, ja'ana zia melu Antipas, ngaa wom ya buni, nyô a nga wôéban e be mia, a vôm Satan a too. 14 Ve me bili wo mam mevok, amu e vôm ô too ô bili ba be bili ñye'elane Balaam, nyô a nga ye'ele Balak ane a ye kolé bone

be Israël ôbak, na be di bityi'a biyeñyeña bi biôm a bo mejian. 15 Nalé ate womiene fe, ô bili ba be bili ñye'elane betôñe Nikôlas aval ete. 16 Ajô ete, kôñela'an nlem. Nge sa nalé, me ji'a zu e be wo, a m'aye wosane be a fansoñ ya anyu dam. 17 Môt a bili melo, a wô'ô jam Nsisim w'ajô bekirke. Môt a dañ, m'aye ve nye nsolane manna ; a m'aye ve nye éfumulu akok, m'afé jôé ô too nkpwelan ako'o ete yôp, ñwô ôte teke'e mô't a yem, ve nyô a nyoñe wô.

Mbañete mfa'a Kirke ya Tiatira

(M.M. 15 :28, 29 ; I Kor 10 :8, 19-22 ; I Tés 1 :2, 3 ; Behéb 6 :9-12 ;

Nkul 3 :11, 21)

18 Tili'i fe éngel ya kirke é ne Tiatira na,

Mone Zambe, nyô a bili mis ane nkaba'a nduan a mebo mé m'afunan ane mvot j'angemban, nnye a jô mam mana na, 19 M'ayeme mimboane miôé, a nye'an , a mbunan, a ésaé mvolan, a mbane njibane wôé, a na, mimboane miôé mi asu'ulan mi ne abui mi dañe mi ya ôsusua. 20 Ve me bili wo jame dina na, w'ajô'é minga ate, Yésabel, nyô a loen émien nkulumejôa minga, na, a ye'ele bebobisaé bam, a yale be zene fe, ane b'aye bo mejian a di bityi'a biyeñyeña bi biôm. 21 Me nga ve fe nye éyoñ ya kôñelan nlem, ve a nji kômbô kôñelan nlem a jô'é mejiane mé, 22 O lôô, m'aye wua nye énoñe yôp ; a ba b'abo mejian a nye, m'aye wua be e beta étibela'a été, nga ve b'akôñelan a jô'é mimboane mié. 23 Nde m'aye wôé bone bé nya ñwôéane, a bekirke bese b'aye yene na, Ma me ne nyô a bi'ili minsimesan a minlem. M'aye fe ve nyô ase ya be mia aval ane mimboane mié mi né. 24 Mia bevo'o mi too e Tiatira, abime bôt e nji bi ñye'elane wu, ba fo'o be nga bo te yem bido'o bi mam bi Satan, ane b'aloene bie, m'ajô mia na, me nji beté mia mbe'e mfe. 25 Ve jame da, jam ô bili, ba'ale'e de akekui m'aye zu. 26 Môt a dañ ba'ale fe mimboane miam akekui asu'ulan..

« M'aye ve nye ngulenjôane ya jôô meyoñ ;

27 a ye fe jôô me a ntum étyé, aval ane mô't, a bôé mevie'e me étek bifus ; »

28 aval ane ma fe me nga nyoñ e be Esaa wom ; a m'aye ve nye ôteté melendé me tyé. 29 Môt a bili melo, a wô'ô jam Nsisim w'ajô bekirke.

Mbañete mfa'a Kirke ya Sardes

(Mat 7 :21-23 ; 24 :42-51 ; Yak 2 :14-26 ; Nkul 7 :9, 13-17)

3 1 Tili'i fe éngel ya kirke Sardes na,

Nyô a bili minsisim mi Zambe zañbwal, a ateté zañbwa, nnye a jô mam mane na, M'ayem mimboane miôé ane ô bili jôé na, vevee, ve ô ne mbim. 2 Mombô'ô, a yemete'e mam me ngenan, mme me mbeme wu ; Amu na, me nga bo te yene mimboane miôé mvo'é asu Zambe wom. 3 Ajô ete, simesa'an aval nyoñan ô nga nyoñ, aval ñwô'an ô nga wôk ; ô ba'ale de, a kôñelan nlem. Ajô ete, nge w'aye bo te mombô, m'aye zu ane ñwuwup, a w'aye bo te yem aval awolo m'aye zu de e be wo. 4 Ve ô bili môé mevok e Sardes, mme me nga bo te ve mengômesane map mvin. Bia be be bi aye wulu nsamba wua, be be'e bifumulu mengômesan, amu b'ayian. 5 Môt a dañ, aval ete a ye jalébane mengômesan, a m'aye bo teke'e ve'ele tyame jôé dé e kalata ényiñ été. M'aye meme jôé dé asu Esaa wom a asu beéngéle bé. 6 Môt a bili melô, a wô'ô jam Nsisim w'ajô bekirke.

Mbañete mfa'a Kirke ya Filadelfia

7 Tili'i fe éngel ya kirke é ne Filadelfia na,

Nyô a ne étyi a bebela, nyô a bili ôdiba'a David, nyô a dii, a teke'e mô't a dip, a dibe fe, a teke' mô't dii, nnye a jô mam mana na, 8 M'ayeme mimboane miôé. O lôô, me teléya mbé ô yoo asu dôé, ñwô ôte teke'e mô't a ne ngul ya dibe wô, amu ô bili ngule tyôtyoé, ô nga ba'ale fe mejô mam, teke'e kate jôé dam. 9 O lôô, m'aye ve wo ba ya ékôane Satan, ba b'aloene bebiene na, Beyude, a be nji bo be, b'alaa ve minsos. O lôô, m'aye bo be na, be zu kumbu e mebo môé si, a b'aye yeme na, ma me nga nye'e wo. 10 Amu ô nga ba'ale mejô ya mbane njibane wom,

ma fe m'aye ba'ale wo mfa'a ya awolo meve'ele, di d'aye zu e be bôt be too si ése nyô, nde d'aye ve'ele ba be too si nyô. 11 Me mbeme zu. Ba'ale jam ô bili, ane teke'e mô't a ye nyoñ ékate jôé. 12 Mô't a dañ, m'aye bo nye akôn e tempela Zambe wom été. A ye bo te fe beta kui atan, a m'aye tili jôé Zambe wom e nyôle jé, nalé fe jôé nlame Zambe wom, mfefé Yérusalem, ñwô w'asis, ô so'o yôb, e be Zambe wom ; nalé fe mfefé jôé wom. 13 Mô't a bili melo, a wô'ô jam Nsisim w'ajô bekirke.

Mbañete mfa'a Kirke ya Laôdikia

14 Tilili' fe éngel ya kirke é ne Laôdikia na,

Nyô a ne Amen, ngaa ya buni a bebela, atata'a ya baa biômô Zambe a nga té, nnye a jô mam mana na, 15 M'ayem mimboane miôé na, ô nji bo avoé, nge ayôñ. 16 O nga yiane bo avoé, nge ayôñ. Nde amu ô ne ntôton, a ô nji bo ayôñ, nge avoé, m'aye yô wo anyu dam. 17 Amu w'ajô na, me ne kum, me nto nkukum, me ne teke'e jeñe jôm, nde amu ô ne te yeme na, wo ô ne nyô a ne nju'ane mô't, a éngôngol, a azoé, a ndim a soé, 18 ajô ete m'abôndé wo fe'e na, ô kuse gôlt e be ma, nyô a tumbaneyá e nduan été, ane w'aye bo nkukum. O kuse fe bifumulu mengômesan, ane w'aye jaé, nde ôson ya soé jôé vi aye bo te kulan, a mbon ya wo'o mise môé, ndemben w'aye yen. 19 Bôte bese m'anye'e, mmbe m'atyeñele a bôm. Ajô ete, tame nyane mam ma, a kôñelan nlem. 20 O lôô, me tele e mbé si, a kut. Nge mô't a wô'ô tyiñe jam a dii me mbé, m'aye nyiin e be nye, a m'aye di e be nye, nnye fe e be ma. 21 Mô't a dañ, m'aye kañese na, bia nye bi tabe si éto njôô jam, aval ane ma fe me nga dañ, a tabe si bia Esaa wom, éto njôô jé. 22 Mô't a bili melo, a wô'ô jam Nsisim w'ajô bekirke.

Nkañane ya yôb été

(Yes 6 :1-3 ; Ezék 1)

4 1 Eyoñ mam mete me nga man, ane me nga yen, a ô lôô, mbé ô ñyoo e yôb été, a tyiñ me nga wô'ô atata'a aval ane nyô toñ é kobô'ô ma, é jô'ô na, Bete

nne, nde m'aye liti wo mam m'ayiane boban mvus éte. 2 Eté éte me nga tabe e Nsisim éte, a ô lô'ô, éto njôô é ntele e yôb éte, 3 nyô a nga too je yôp : ñyenan me nga yene nye, a nga funan ane ako'o yaspé a di sardôniks. Ndutum ô bôma'ane fe éto njôô éte, ô funa'an ane ako'o émarôd. 4 Bitô bejôô mewôm mebaé a binyin bi nga bômane fe éto njôô éte, a bemvendé mewôm mebaé a benyin be nga too si e bitô bejôô bite yôp, be be'e bifumulu mengômesan, a bikate bi gôlt e minlô. Befeleves a metyiñ a mindum mi mveñ bi nga vam, bi so'o éto njôô, a belambe be nduan zañbwal be yôñôk asu éto njôô, mmbe bete be ne minsisime mi Zambe zañbwaa. 6 Asu éto njôô, jôm é mbe aval ane mañ me éyen, é funa'an ako'o kristal.

Nde bevevee be biôm benyin be tele e teme éto njôô, be bôma'ane fe je, be too njalan a mis ne lut mfa'a ya ôsu a mfa'a ya mvus. 7 Vevea jôm ya ôsu a nga funan ñbweñbwem, a vevea jôma baa a nga funan étoñ ényaka, a vevea jôma lale a nga bili asu aval ane di mô't, a vevea jôma nyini a nga funan ndôé j'aye. 8 Nde bevevee be biôm bete benyin, wua ase ya éte a bili mefap mesaman, me too fe njalan a mis ne lus, mbôman'ane ya mefabe si, ve mise mis. Be ne te jô'é jô môse baa alu na.

« Etyi, étyi, étyi, Nti Zambe, nyô a ne ngul ése.

Nyô a nga too, nyô a too, a nyô a ye zu. »

9 Nde éyoñ bevevee be biôm bete benyin b'ave дума, a ôlu'u, a akéva, e be nyô a too si éto njôô, e be nyô a vee akekui nnôm éto, a nnôm éto, 10 éyoñ éte bemvendé mewôm mebaé a benyin b'abuti mesu e si amu nyô a vee akekui nnôm éto a nnôm éto, be wu'a fe bikate biab asu éto njôô, be jô'ô na,

11 Wo w'ayian, A Nti wongan a Zambe wongan

Na, ô nyoñe дума, a ôlu'u, a ngul ;

amu wo ô nga té biôm bise,

ve amu nkômbane wôé bi nga too, a bi nga téban.

Rev. Matthias
Secrétaire Général

Mvulukane kalate

(Yôh 5 :22 ; Rôm 11 :33, 34 ; Ef 1 :10 ; Fil 2 :5-11 ; Nkul 1 :5, 6 ; 7 :9-12)

5 1 Ane me nga yene kalate a bôô e wo été, wu ya mbonnôm ya nyô a too éto njôô, a too ntilan été a mvus, mftan a mimfeta'a zañbwaa. 2 Ane me nga yen éwôlô éngel é kañete'e mam a beta tyiñ na, Za a ne yiane na, a kuui kalate a kuli mimfeta'a ya été ? 3 Nde teke'e mô't, e yôb été, nge si nyô, nge e si nyina si, a mbe ngul ya kuui kalate ate, nge fombô nye. 4 Ane me nga dañe yi du, amu teke'e mô't a nga yené, a yi'ane kuui kalate ate, nge fombô nye. 5 Nde wua ya bemvendé bete a nga jô me na, Te yi du. O lôô, ñbweñbwem j'aso ayoñe Yuda, nje é ne ndi David, é dañeya ane j'aye kuui kalate ate a mimfeta'a zañbwal ya été.

6 Ane me nga yene Mone Ntômba a tele ézezañ éto njôô e bevevee be biôm benyin, a ézezañ bemvendé, a too aval ane nge a wôébaneya ; a bili minla'a zañbwaa, a mise zañbwaa, mme mete me ne minsisim mi Zambe zañbwaa mi nga lômban e si ése. 7 Nde a nga zu nyoñe kalate ate e wo ya mbonnôm ya nyô a too si éto njôô. 8 Eyoñ a nga nyoñe nye, bevevee be biôm benyin, a bemvendé mewôm mebaé a benyin, be nga buti mesu e si asu Mone Ntômba, mô't ase ya été a bili mvet a bido'o bisua bi gôlt, njalan a mbon mbamba menyum, ñwô ô ne meye'elane mimfufub. 9 Nde b'ayia mfefé jia, be jô'ô na,

Wo w'ayiane nyoñe kalate,

a kuli mimfeta'a ya été :

amu ô nga wôéban a kuse Zambe bôt a metyi môé,

be so'o mvoñe bôt ése, a nkobô, a bôt, a ayoñ.

10 Nde ô nga bo be na, be bo ngum éjôé a beprêtre be Zambe wongan,

a b'aye jôô si nyô.

11 Ane me nga yen, a me nga wô'ô tyiñ beéngel abui, be bôman'an éto njôô a bevevee be biôm a bemvendé ; a tañe jap é mbe bezololo ya bezololo, a betoyini ya betoyini, 12 be jô'ô a beta tyiñe na,

Rev. Matthias

Secrétaire Général

Mone Ntômba, nyô a nga wôéban, nnye a yiane nyoñ éwôlô,

a afok, a ñyemane mam, a ngul a ôlu'u, a дума, a ébotan.

13 Nde ététéa jôm ése é ne e yôb, a si nyô, a e si nyina si, a mañ, a biôm bise bi ne bie été, me nga wô'ô bi jô'ô na,

E be nyô a too si éto njôô, a be

Mone Ntômba,

Ebotan, a ôlu'u, a дума a éwôlô, bi bo'o

nnôm éto akekui nnôm éto.

14 Nde bevevee be biôm benyin be nga bo be jô'ô na, Amen. A bemvendé be nga buti mesu si, a kañ.

Mimfeta'a

(Ezék 14 :21 ; Zak 1 :8-10 ; 6 :1-7 ; Mat 24 :6-8 ; 2 Kor 2 :14-16)

6 1 Ane me nga yen éyoñ Mone Ntômba a nga kuli mfeta'a wua ya mimfeta'a zañbwaa, a me nga wô'ô wua ya bevevee be biôm benyin, a kobô'ô, a tyiñ aval ane nyô ndum mveñ na, Za'ak ! 2 Nde me nga yen, a ô lôô, éfumulu ékabela, a nyô a nga too je yôb a bili élaé mewosan, a ékat é nga veban e be nye. A nga kôlô e si a ke ane nyô a dañ, a na, a ke dañ.

3 Eyoñ a nga kuli mfeta'a baa ya été, me nga wô'ô vevea jôma baa a jô'ô na, Za'ak ! 4 Ane ékabela éfe é nga kôlô e si a ke, é too évele ne zôsazôsan, a nyô a nga too je yôb a nga nyoñ ngule na, a vaa mvo'é si nyô, ndemben bôt be wôéan. Beta fansoñ a nga vebane fe e be nye.

5 Eyoñ a nga kuli mfeta'a lale, me nga wô'ô vevea jôma lale a jô'ô na, Za'ak ! Ane me nga yen, a ô lôô, évindi ékabela, a nyô a nga too je yôb a bili kob e wo wé été. 6 Ane me nga wô'ô jam aval ane nge tyiñ é so'o ézezañe bevevee be biôm

benyin, e jô'ô na, Mone jate blé wua, denié jia ; a bone be biate be orge bela, denié jia ; ve te ndaman mbon baa wain.

7 Eyoñ a nga kuli mfeta'a nyini, me nga wô'ô tyiñe vevea jôma nyini, é jô'ô, na, Za'ak ! 8 Ane me nga yen, a ô lôô, ékabela nyôle ne ñyelekayelean, a nyô a nga too je yôb, jôé dé e too na, Awuu ; Hadés ke a tôñe nsamba wé. Ane ngul é nga veban e be be mfa'a ya ngabe nyini ya si nyô na, be wôé bot a fansoñ, a mfumbale zaé, a awu a minyôyo'o betit ya si nyô.

9 Eyoñ a nga kuli mfeta'a tane, me nga yene bôt be nga wôéban étom mejô me Zambe, a étom nkañete be nga kañete, be bôô altar si. 10 Ane be nga yôtan a beta tyiñ, a jô na, A Beta Njôô, nyô a ne étyi a bebela, ntaa vé w'aye bo te tyi'i ajô a kune metyi mangan e be ba be too e si nyô ? 11 Nde mô't ase ya été a nga nyoñ éfumulu ayab alô'ô, ane e nga jôban e be be na, be tame wo'an mone nté, akekui tañ ya beébe bebobisaé babe fe a bobenyañe bab be ngenan be ye'e wôéban aval ane be, j'ajaé.

12 Ane me nga yen éyoñ a nga kuli mfeta'a samane, beta mfô'ôsane si a nga boban, a jôb e nga veñesan évindi aval ane nkuta éndelé, a abôme ngon e nga boban ane metyi. 13 Ateté ya yôb e nga ku fe e si nyô aval ane bityese bi fige bi aku e si éyoñ beta évuñulu a fô'ô élé fige. 14 Nde yôb e nga kôlô aval ane kalate b'avuluku, a beta nkôl ase a ékôte mañ ése, bi nga vas e mevôme map, 15 e bejô bôt ya si nyô, a benya bômva, a bivete binner, a minkukum, a biwôlô bi bôt, ôlo ôse, a nti ase, be nga sobô e mibase meko'o été a mekôm ya beta minkôl été. 16 Be nga jô fe beta minkôl a mekôme na, kpwa'ane bia e yôb, a solé bia asu nyô a too si éto njôô, a mfa'a ya ayaa Mone Ntômba, 17 amu beta môs ya ayaa dab a kpwaaneya, a za a ne ngul ya beta tebe ?

Bon be Israël 144.000 b'alumbane sitam

(Yes 9 :3-6 ; Rôm 11 :26 ; Nkul 14 :1-5)

7 1 Mvus éte me nga yene beéngéle benyin be tele e meku'u menyin ya si, be kame'e bivuñulu binyin ya si ane teke'e évuñulu é ne vuñ e si nyô, nge e mañe yôp, nge mfa'a ya élé éziñ. 2 Ane me nga yen éngéle mfe a betek, a so'o mfa'a jôp d'atôô,

Rev. Matthias

Secrétaire Général

a bilil sitam vevea Zambe. Ane a nga yôtan a beta tyiñ e be beéngéle benyin, mmbe be nga veban na, be ndamane si a mañ, 3 A jô'ô na, Te tama ndamane si nge mañ, nge bilé ve akekui éyoñ bi maneya lum bebobisaé be Zambe wongan sitam e mvome mesu jap. 4 Ane me nga wô'ô tañ ya ba be nga lumbane sitam : toyini ntet, a toyini mewôm menyin a ényin ; a ba be nga lumbane sitam be nga so e be ayoñ ese ya bone be Israél.

5 Ba be nga so ayoñe Yuda be nga lumbane sitam, bôt toyini awôm a ébaé ;

Ba be nga so ayoñe Ruben, bôt toyini awôm a ébaé ;

Ba be nga so ayoñe Gad, bôt toyini awôm a ébaé ;

6 Ba be nga so ayoñ Aser, bôt toyini awôm a ébaé ;

Ba be nga so ayoñe Naftali, bôt toyini awôm a ébaé ;

Ba be nga so ayoñe Manasé, bôt toyini awôm a ébaé ;

7 Ba be nga so ayoñe Siméôn, bôt toyini awôm a ébaé ;

Ba be nga so ayoñe Lévi, bôt toyini awôm a ébaé ;

Ba be nga so ayoñe Isakar, bôt toyini awôm a ébaé ;

8 Ba be nga so ayoñe Zabulon, bôt toyini awôm a ébaé ;

Ba be nga zo ayoñe Yôsef, bôt toyini awôm a ébaé ;

Ba be nga so ayoñe Benjamin, bôt toyini awôm a ébaé be nga lumbane sitam.

Beta ézu'u bôt, a so'o meyoñ

(Yes 49 :10 ; Yôh 10 :16 ; Rôm 11 :25 ; Nkul 3 :5 ; 5 :8-10 ; 21 :3, 4)

9 Mam mete me maneya, ane me nga yen, a ô lôô, beta nsamba ézu'u bôt, teke'e mô't a mbe ngule ya lañe be, be so'o e be meyoñe mese, a menda me bôt, a meyoñ a minkobô, be tele asu éto njôô, a asu Mone Ntômba, be be'e ayabe bifumulu melô'ô, a mebui melen e mo mab. 10 A be nga yôtan a beta tyiñ, be jô'ô na,

Rev. Matthias

Secretary General

Nyian ô ne jôme Zambe wongan,

Nyô a too si éto njôô Mone Ntômba. 11 Nde beéngéle bese be tele mbôma'ane éto njôô, be bôma'ane fe bemvendé a bevevee be biôm binyin, be nga buti mesu mab e si asu éto njôô, a kañe Zambe, 12 be jô'ô na,

Amen : Ebotan, a дума, a ñyemane mam, a mvean akéva, a ôlu'u, a éwôlô, a ngul, bi bo'o be Zambe wongan, akekui nnôm éto a nnôm éto. Amen.

13 Nde wua ya bemvendé a nga yalan, a jô me na, Ba be be'e ayabe bifumulu melô'ô ba be ne beza ? a be nga so ke vé ? 14 Ane me nga jô nye na, A Monti, ke wo w'ayem. Ane a nga jô me na, E bôte bana be ne ba b'aso e beta étibela'a été. Be nga sôbe fe ayabe melô'ô dabe di a bo de éfumulu e metyi me Mone Ntômba été. 15 Amu ajô ete nde be ne de asu éto njôô Zambe, a b'asaane nye môs baa alu e tempele wé été ; a nyô a too si éto njôô a ye buti be a tabernakele wé. 16 B'aye bo te fe wô'ô zaé, nge beta wô'ô évé ; nalé fe jôp d'aye bo te fe bi be e nyô, nge ényan éziñ.

17 Amu na, Mone Ntômba a too ézezañ éto njôô nnye a ye ba'ale be, a li'itane be e mevôm mebôndôñe bevevee mendim me né, a Zambe a ye fimi be dili'i ese e mise map.

Mfeta'a zañbwale a ésua gôlt ya mbon mbamba menyum

(Luk 1 :9, 10 ; Yak 5 :16-18 ; Nkul 5 :8)

8 1 Nde éyoñ a nga kuli mfeta'a zañbwale, évôl é nga bo e yôb été nté ya étun awolo. 2 Ane me nga yene beéngéle zañbwaa, ba be tele asu Zambe; nde metoñe zañbwal me nga veban e be be.

3 Ane éngéle mfe a nga zu tebe mfôm altar, a bili ésua gôlt ya mbon mbamba menyum é nga veban e be nye, ane a ye kô'ôlane wô a meye'elane mimfufub mise e altar gôlt yôp, nnye a ne asu éto njôô. 4 Nde ôtita ya mbon mbamba menyum ô nga bet asu Zambe mfula'ane a meye'elane mimfufub, ô so'o wo éngel. 5 Engel a nga nyoñ ésua mbon mbamba menyum, a jalé je nduan é so'o nyô ya altar ; ane a nga

wua nduan e si nyô, nde mindum mi mveñ mi nga bo, a metyiñ, a befeleves, a mfô'ôsane si.

Metoñ

(Nkôl 7:19-21; 9:22-25; 10:21-23; Nkul 14:7; 16:1-9)

6 Ane beéngelē zañbwaa, be nga kômesane na, b'aye loñ.

7 Ane nyô ya ôsu a nga lone toñ, nde meta'a a nduan bi nga bo, mfula'ane a metyi, a bi nga wuaban e si nyô. Nde ngabe lale ya si é nga dik, a ngabe lale ya bile é nga dik, nalé fe bilele'e bilok bise bi nga dik.

8 Ane éngela baa a nga loñe toñ, nde jôm é too aval ane beta nkôl a yôñ a nduan é nga wuaban e mañ été, nde ngabe lale ya mañ é nga bo metyi; 9 a ngabe lale ya bitétéa bi biôm, bi mbe e mañ été, bi bi nga bili ényiñ é nga wu; nalé fe ngabe lale ya bifunga bi nga mane ndaman.

10 Ane éngela lale a nga loñe toñ, nde beta ôteté a nga ku, a so'o yôp, a yôñôk ane ngôé. Ane a nga ku ngabe lale ya asôé e yôp, nalé fe mebôndôñ mendim e yôp. 11 Nde jôé ôteté ôte e mbe na, Yôlôyôlô. Ngabe lale ya asôé é nga bo ayô, a bôt abui be nga wu amu mendim mete, amu me nga boban ayô.

12 Ane éngela nyini a nga loñe toñ, a ngabe lale ya yôb é nga fitiban, nalé fe ngabe lale ya ngon, a ngabe lale ya ateté, nde ete ngabe lale ya biôm bite j'aye dim, a môs w'aye bo te faé nté ya ngabe lale ya été, alu fe aval ete.

13 Ane me nga yen, a me nga wô'ô fe ndôé jia, é yele'e ézezañe yôp, é jô'ô a beta tyiñe na, Ngo'o Ngo'o, ngo'o ba be too e si nyô, amu metyiñe metoñ me ngenan, mme beéngelē belal be mbeme zu loñ.

9 1 Ane éngela tane a nga loñe toñ, ane me nga yen ôteté ô nga ku e si nyô, ô so'o yôp, nde ôdiba'a ya febebee édo'o ébé ô nga veban e be vie. 2 Ane ô nga dii mbé ya febebee édo'o ébé ate, a ôtita ya beta mbe'e nduan. Jôb a ñyem bi nga bo dibi amu ôtita ya ébé éte. 3 Ane bitanda'a bi nga mialan e si nyô, bi so'o ôtita été, a ngul é nga

Rev. Matthias
Secrétaire Général

veban e be bie, aval ane ngul alé ya si nyô. 4 Nde e nga jôban e be bie na, bi bo te ndamane bilo'o ya si nyô, nge mekaé méziñ, nge élé éziñ; ve bi aye ndamane bôt, ba be nji bi sitame Zambe nluman e mvom mesu jap. 5 Ane e nga veban e be bie na, bi bo te wôé bôt, ve na, be tame ju'u mintaté nté ya ngon étan. Mintaté miap mi mbe aval ane mintaté mi ôlé, éyoñ vi alôbe mô: 6 a zia melu éte bôt b'aye jeñ awu, a b'aye bo teke'e yene de. B'aye yi na, be wu, awu ve mate be.

7 Nde éfunan ya bitanda'a bite é mbe jia ya bikabela bi nto nkômesane ya ke bita, bi be'e fe biôm e minlô miab aval ane bikat, bi funa'an gôlt. Mesu map me mbe aval ane mesu me bôt. 8 Bi nga bili ésil aval ane ésile binga, a mesôñe map me mbe aval ane ma beñbweñbwem ; 9 a bi nga bili bibuta'a bi tôé bi ne étyé. Eduñ ya mefabe mab é mbe aval ane éduñe bewagoñ bita be bili abui bikabela d'ake mimbile bita ; 10 a bi bili akot e funa'an akot alé, a minsoñ ya lôp. Ngule jap ya ndamane bôt nté ya ngon étan é mbe bie akot été. 11 Bi bili njôô a jôô bie, nnye a ne éngel ya febebee édo'o ébé ; jôé dé e too nkobô Hébru na, Abadôn, a bili jôé nkobô Grek na, Apôliôn.

12 Ngo'o ya ôsu a lôteya ; ô lôô, bengo'o bebaé be ngenan be ye'e zu mvus éte.

13 Ane éngela samane a nga loñe toñ, a me nga wô'ô tyiñ é so'o ézezañe minla'a minyin ya altar gôlt, nnye a ne asu Zambe, 14 é jô'ô éngela samane, nyô a bili toñ na, Ti'i beéngele benyin be ne nka'an e beta ôsôé Efratus. 15 Ane beéngele benyin, ba be nto nkôman ajô awolo ete, a môs ôte, a ngon éte, a mbu ôte, be nga tiiban, nde b'aye wôé ngabe lale ya bôt. 16 Tañe minsamba mewosan ya ba be nga too e bikabela yôp é mbe bakuta awôm biyoñ bakuta awôm biyoñ bibaé. Me nga wô'ô tañe jap. 17 Nde ñyenan ôte été, me nga yene bikabela, a ba be nga too bie e yôb avale di : be nga bili bibuta'a bi tôé, nyôl ane nduan, a nyô ane hiakintos, a nyô ane sufre. Nde minlô bikabela bite mi mbe aval ane minlô beñbweñbwem ; wôna nduan a ôtita a sufre bi vamek e menyu map. 18 Ngabe lale ya bôt é nga wôéban amu bibubua bite bila, amu nduan, a ôtita, a sufre, mbie bi nga bo bi vamek e menyu map. 19 Amu ngule bilabela bite é ne e menyu mab été, a e menjeme mab été : amu menjeme map m'afunan ane benyo, a me bili minlô ; bi ndam'ane fe bôt a me.

20 Nde ba bevok, bôt be nga bo te wôéban a bibubua bite, be nga bo te kôñelane minlem a jô'é mimboan ya mo map, ane b'aye bo te kañ mbia minsisim, a biyeñeyaña bi biôm bi gôlt, a bi bi silba, a bi bi mvot, a bi mekok, a bi bilé, mbie bi se

ngul ya yen, nge wôk, nge wulu. 21 Be nji fe kôñelane minlem a jô'é ñwôéan be nga wôé bôt, nge mboane bemvi'i wop, nge mejiane map, nge wube wop.

Engel a mvulukane kalate

(Ezék 2 :8-10 : 3 :1-4 : Dan 12 :7-9)

10 1 Ane me nga yen éwôlô éngel éfe é sisik, é so'o yôb été, é jaéya nkut ane ngômesan. Ndutum ô mbe nye e nlô yôp, a asu dé e too aval ane jôp, a mebo mé ane mekoñe me nduan. 2 Nde a nga bili ôyôme mvulukane kalate e wo wé été; ane a nga télé abo dé ya mbonnôm e mañe yôp, a di ya mbongale ke e kindi'i yôp. 3 Ane a nga yôtan a beta tyiñ, aval ane ñbweñbwem j'abam. Nde éyoñ a nga yôtan, mindum mi mveñe zañbwaa mi nga kuli metyiñe map, 4 a éyoñ mindum mi mveñe zañbwal mi nga kuli metyiñ, me nga ye tili. Ane me nga wô'ô tyiñ, é so'o' yôb été, é jô'ô na, Fetek, mam mindum mi mveñ mite zañbwal mi ate kuli, a te tili me. 5 Nde éngel me nga yen a tele e mañe yôp a e kindi'i yôp,

“a nga bete wo wé ya mbonnôm mfa'a ya yôp,

6 a kan ngana e be nyô a vee akekui nnôm éto a nnôm éto,”

nyô a nga té yôp a biôm bi ne été, a si a biôm bi ne été, a mañ a biôm bi ne été, na, éyoñ j'aye fe beta bo, 7 ve zia melu tyiñ ya éngala zañbwale, éyoñ a ye loñe toñ, éyoñ éte nsolane jam Zambe w'aye tôéban, aval ane a nga kate bebobisaé bé, bekulemejô, mbamba foé ya été.

8 Nde tyiñ me nga wô'ô é so'o yôb été, nje é nga beta kobo ma, é jô'ô na, Kelek, ô nyoñe kalate a ne nkuuian e wo éngel été, nyô a tele e mañe yôp a e kindi'i yôp. 9 Ane me nga ke e be éngel ate, a jô nye na, a ve me ôyôme kalate ôte. Ane a nga jô me na, Nyoñok, ô di vie ôse. Vi aye bo ayôl abum dôé, ve anyu dôé été vi aye bo éyôyok aval ane wôé. 10 Ane me nga nyoñ ôyôme kalate ôte e wo éngel été a di vie ôse. Nde anyu dam été ô nga bo éyôyok aval ane wôé, ve éyoñ me nga mane di vie, ô nga bo abume dam ayô. 11 Ane be nga jô me na, W'ayiane beta kulu mejô ajô abui meyoñ, menda me bôt a minkobô a bejô bôt abui.

Bengaa bebaé

(Nkôl 7 akui 10 ; 1 Bejôô 17 :1 ; 2 Bejôô 1 :2-12 ; Zak 4 ; Luk 21 :24)

11 1 Ane be nga ve me nkaé ô funa'an ntum, be jô'ô me na, Kôlô'ô e si, ô ve'e tempela Zambe, a altar, a ba b'akañ été; 2 ve nseñ ya ô ne tempel atan, ô li'i wô, a te ve'e wô, amu ô vebaneya e be bikul, mbie bi aye tibi nlam ô ne étyi a mebo, nté bengon mewôm menyin a bebaé. 3 Nde m'aye ve bengaa bam bebaé ngu, a b'aye kulu mejô nté melu toyini, a mintete mibaé a melu mewôm mesaman, be be'e mengômesane minkuta. 4 Balé bete be ne beôlivié bebaé, a bitelé belambe bibaé, bi bi tele asu Nti ya si ése. 5 Nde nge môt éziñ a kômbô ndamane be, éyoñ éte nduan j'avam, é so'o anyu dap, a tume besiñe bap. Nge môt éziñ a kômbô ndaman be, aval ete a yiane wôéban. 6 Balé bête be bili ngule na, be dibe yôp, ane mveñ j'aye bo te noñ zia melu ya nkulane mejô wop. Be bili fe ngule ya jôô mendim mese, me veñesane metyi, a na, be bili si nyô a aval ébubua ése biyoñe bise be ne kômbô. 7 Nde éyoñ b'aye sondô nkañete wop, ñyôyo'o tit, ñwô w'abet, ô so'o e febebee édo'o ébé été, w'aye kui be bita, a dañe be, a wôé be. 8 Nde mimbime miap mi aye bômbô e nseñ ya beta nlam, nnye ate a looban e nsisime na, Sodom a Egipten, vôm ate fe Nti wob a nga tyeléban e krôa. 9 Nde bôte bevo'o ya meyoñ, a ba ya bitunga bi bôt bise, be so'o e minkobô a menda me bôt, b'aye lôbô mimbime miap nté ya môse milal a étun, be teke kañese na, mimbime miap mi jambe soñ; 10 a ba be too e si nyô be wô'ô mevak a bo mefôn ajô dap. B'aye lômane mimvean, amu na, bekulumejô bête be nga dañe ndeñele bôt be too e si nyô. 11 Nde éyoñ melu melal a étun mete me lôteya, mvebe ényiñ ô nga nyiin e be be, ô so'o be Zambe, ane be nga tebe betetele a mebo map, a beta woñ a nga bi bôt be nga bo be lôbô'ô be. 12 Ane be nga wô'ô beta tyiñ a so'o yôp, a jô'ô be na, Betan e yôbe nne. Ane be nga bet e yôb été, be too e nkut été, a besiñe bap be nga lôbô be. 13 Awolo ete ebiene fe, beta mfô'ôsane si a nga boban, a ngab awômô ya nlam ôte é nga ku, a bôt toyini zañbwal be nga wôéban amu mfô'ôsane si ôte, a ba bevok be nga fô'ôban a ve Zambe a too e yôb été duma.

14 Ngo'o baa a lôteya, a ô lôô, ngo'o lale a zu ana'ana.

Toñe zañbwale

(Besam 2; 98; Dan 7:9-14; Nkul 12:10; 19:6)

15 Nde éngela zañbwale a nga loñe toñ, a beta metyiñ me nga kuliban e yôb été, me jô'ô na,

Ejôé ya si nyô é nto ji Nti wongan a Krist wé,
a a ye jôô nnôm éto akekui nnôm éto.

16 Ane bemvendé mewôm mebaé a benyin, mmbe be too si asu Zambe e bito bejôô biap, be nga buti mesu mab e si, a kañe Zambe, 17 be jô'ô na,

Bi ave wo akéva, A Nti Zambe, Nyô a ne ngul ése,
Nyô a too, a nyô a nga too,
amu ô nyoñeya beta ngule wôé, a ô nga jôô.

18 A meyoñ me nga yaa,

nde ayaa dôé e nga zu,
nalé fe éyoñ ya miñwuan mi atyi'ibane mejô,
a éyoñ ya ve bebobisaé, bekulemejô, meya'ane map ;
nalé fe mimfufub, a ba b'ako jôé dôé woñ,
ba betok a ba bennen, a éyoñ ya jiane ba b'ajiane si nyô é kpwaaneya.

19 Nde tempela Zambe a ne e yôb été a nga diiban, a éwolo élate jé é nga yené e tempele wé été ; a befeleves, a metyiñ, a mindum mi mveñ, a mfô'ôsane si, a beta meta'a bi nga bo.

Rev. Malinas
Secrétaire Général

Minga baa Dragon

(Gal 4:19, 26 ; I Pét 5 :8 ; Nkul 2 :26, 27)

12 1 Nde beta ndem a nga yené e yôb été : minga a be'e jôb ane ngômesan, a ngon é bôô nye e mebo mé si; a be'e ékat e nlô wé yôp, nje é bili ateté awôm a abae; 2 minga ate a too fe abum. Ane a nga yôtan amu a kô'ôlô mie, a du'ulane fe mintaé mi abiaé. 3 Ane ndeme fe é nga yené e yôb été, a ô lôô, beta évele dragon, a bili minlô zañbwal a minla'a awôm, a be'e fe bibeba'a bi éjôé zañbwal e minlô mié yôp. 4 Okote vié vi awo'otô ngabe lale ya atété ya yôp ; ane a nga wua de e si nyô ; a dragon ate a nga tebe asu minga a zu biaé ate na, éyoñ a ye biaé, a ye sebeke mone wé. 5 Ane minga a nga biaé mona fam ya a yiane jôô meyoñ mese a ntum étyé, ve mone wé a nga to'éban e be Zambe, mfa'a éto njôô jé é né. 6 Ane minga a nga tup, a ke e fé été, vôm Zambe a nga kôme nye, ane b'aye ve nye bidi melu toyini, a mintete mibaé a melu mewôm mesaman.

7 Ane bita bi nga bo e yôt été : Mikaél ba be beéngéle bé be nga wosane dragon. Nde dragon fe a nga bo bita ba beéngéle bé ; 8 ve be nga tek, a éto é nji beta bo be e yôb été. 9 Ane beta dragon ate a nga wuaban e si, nnôme nyo ôte, wu w'alobane na, Diable a Satan, ndu'u bôt ya si ése. A nga wuaban e si nyô, a beéngéle bé fe be nga wuaban e si e nsamba wé. 10 Ane me nga wô'ô beta tyiñ e yôb été, a jô'ô na,

Eyoñe ji nyian, a éwôlô, a éjôé Zambe wongan,

nalé fe ngulenjôane Krist wé, bi nto:

amu nyô a bo'olô bobejañ a wuabaneya e si,

môt a nga bo a bo'olô'ô be asu Zambe môse baa alu.

11 Nde be nga dañe nye amu metyi me Mone Ntômba,

a amu mejô ya nkañete wop,

Rev. Matthias
Secrétaire Général

a be nga bo te nye'e éyiñe jap ja'an akekui awu.

12 Ajô ete, Va'an, A yôp,

nalé fe ba be too de été,

Ngo'o si a mañ,

amu diable a wuabaneya si e be bia,

a bili beta ayaa,

amu a yeme na, a bili ve étun éyoñ.

13 Nde éyoñ dragon a nga yene na, a wuabaneya e si nyô, ane a nga kpwe'ele minga a nga biaé mona fam. 14 Ve mefap me beta ndôé mebaé me nga veban e be minga ate na, a yele a ke e fé été ôyab a asu nyô vôm a ye vebane bidi nté ya ngum éyoñ, a biyoñ, a étun éyoñ. 15 Ane nyo é nga yô mendim, abima ôsôé, me so'o anyu dé été, mfa'a minga a nga too, ane a ye bo na ôsôé ô yandane nye. 16 Nde si é nga volô minga, a si é nga kuui anyu dé a min ôsôé dragon a nga yô anyu dé. 17 Nde dragon a nga yaa ajô minga ate, ane a nga kôlô na, a ke kui ba bevo'o ya mvoñe jé bita, ba b'aba'ale memvinda me Zambe a kabetan e nkañete ya ajô Jésus. 18 Ane a nga zu tebe e nsele'e mañ.

Miñyôyo'o betit mibaé

(Dan 7 :3, 7, 8, 19-25 ; Nkul 17 : 3, 7-17 ; 19 :19-21)

13 1 Ane me nga yen ñyôyo'o tit éziñ ô betek, ô so'o mañ été, ô bili minla'a awôm, a minlô zañbwaa, ô be'e fe bibeba'a bi éjôé e minlô mié yôp ; a jôé ébiasé Zambe e mbe ntilan e minlô mié yôp. 2 Nde ñyôyo'o tit ya me nga yen ô nga funan ane ze, a mebo mé me mbe aval ane ma me akamenyañ (ébôñ), a anyu dé aval ane anyu ñbweñbwem. Ane dragon a nga ve wô ngule jé, a éto njôô jé, a beta ngulenjôan. 3 Ane me nga yen nlô wua ya minlô mié ô nto aval ane nge ô baléya aveñ ya awu, ane aveñe dé ya awu e nga mane yet. Ane si nyôna ése é nga tôñ ñyôyo'o tit ôte a ésemen. 4 Ane bôt be nga kañe dragon, amu a nga ve ñyôyo'o tit

ôte ngulenjôan. Be nga kañe fe ñyôyo'o tit, be jô'ô na, Za a funan ñyôyo'o tit ôte, a za a ne ngul ya wosane wô ?

5 Anyu e nga veban e bo wô na, ô kobô beta be mam a mejô me ébiasé Zambe ; a ngul é nga veban e be wô na, ô bo mam mé nté ya ngon mewôm menyin a ébaé. 6 Ane ô nga kuui anyu dé na, ô kobô Zambe ébiasé, mfa'a ya ndamane nye jôé, nalé fe étaba'a jé, a ba bese be too e yôb été. 7 Ane e nga veban e bo wô na, ô kui bita e be mimfufub, a dañe mie. Nde ngulenjôan ya jôô nda bôt ése, bôt a minkobô a meyoñ mese, é nga veban e be wô. 8 Ane ba bese be nga too e si nyô be nga kañe wô, nyô ase jôé dé e nji bo ntilan e kalate ényiña Mone Ntômba, nyô a nga wôéban aso mbô'an ya si nyô.

9 Nge mô't éziñ a bili alo, a wô'ôk.

10 Nge mô't éziñ a ne nyô ya ke e minkôm, a ye ke minkôm ;

Nge mô't éziñ a ye wôé mô't a fansoñ, émien a ye fo'o wôéban a fansoñ.

E jame dina nde e ne mbane njiban a mbunane mimfufub.

11 Ane me nga yen ñyôyo'o tit mfe ô betek, ô kuik e si été ; ô nga bili minla'a mibaé, mi funa'ane ane mi mi mone ntômba, a ô nga kobô tyiñ dragon. 12 Ane ô nga belan ngule ñyôyo'o tit ya ôsu ése asu dé. Nde ô nga bo si nyôna, a bôt be too été na, be kañ ñyôyo'o tit ya ôsu, ñwô aveñe dé ya awu e nga mane yet ; 13 a w'abo beta mendem, nde ja'ana nduan w'abo je é sis, é so'o yôb a kui e si nyô, bôt be lôô. 14 W'adu'u fe ba be too e si nyô amu mendem mete, mme me nga veban e be wô na, ô bo me asu ñyôyo'o tit, a jô fe ba be too e si nyô na, be bo éyeka'a ñyôyo'o tit ôte, ñwô ô bili aveñ fansoñ, ô beta veebe. 15 Nde e nga veban e be wô na, ô ve éyeka'a ñyôyo'o tit ôte mvebe, ane éyeka'a ñyôyo'o tit été j'aye kobô ; é nga bo fe na, abime bôt d'aye bo te kañ éyeka'a ya ñyôyo'o tit ôte d'aye wôéban. 16 Ane ô nga bo bese, ba betok a ba bennen, minkukum a minzôzoé, ba be ne beti a belo, na, be teneban ndeme jé e mo map ya mbonnôm, nge e mvom mesu jap; 17 a na, mô't a bo te ngul ya kus, nge kuane jôm, vengevenge ve nyô a bili ndem éte, e ne na, jôé ñyôyo'o tit, nge tañ ya jôé dé. 18 E jame dina été nde e ne ñyemane mam. E mô't a bili fek, a lañe tañ ñyôyo'o tit ôte, amu é ne tañ ya mô't ; a tañe jé é ne mintete misaman, mewôm mesaman, a ésaman.

Jia bôt 144.000

(Behéb 12 :22-24 ; Nkul 7 :3)

14 1 Ane me nga yen, a ô lôô, Mone Ntômba a tele e nkôle Siôn yôp, baa be bôt toyini ntet a mewôm menyin, a bôt toyini ényin, be be'e jôé dé, a jôé Esaa, ntilan e mvom mesu jap. 2 Ane me nga wô'ô tyiñ, é so'o yôb été, aval ane éduñ abui mesôk, avale fe ane éduñe beta ndume mveñ. Nde tyiñ me nga wôk é mbe aval ane nge bebôme mvet b'abôm memvete map 3 Ane b'ayia mfefe jia asu éto njôô, asu bevevee be biôm benyin, a asu bemvendé; a teke'e mô't a mbe ngul ya ye'é jia éte, vengevenge ve bôt toyini ényin, ba be nga kôtéban, be so'o si nyô. 4 Balé bête be ne ba be nji ve bebien mvin e bo binga, amu be ne bindun. Balé bête b'atôñe Mone Ntômba e vôm ase a ke. Balé bete be ne ba be nga kôtéban, be so'o be bôt. Be ne bembômô mfa'a Zambe a mfa'a Mone Ntômba. 5 Minsos mi nji yené e menyu map; be ne teke'e aton.

Mimbañete mi beéngle bela

(Mat 24 : 14 ; M.M. 17 :30, 31 ; Nkul 18 ; 19 :19, 20)

6 Ane me nga yen éngle mfe a yele'e ézezañe yôp, a bili mbamba foé ya nnôm éto na, a kate nye ba be too e si nyô, ayoñ ese, nda bôt ése, a nga jô a beta tyiñe na, Koane Zambe woñ a ve nye duma, amu awolo ya ntyi'ane mejô e kpwaaneya ; mi kañane fe nyô a nga bo yôb a si a mañ, a mebôndôñ mendim.

8 Nde éngle mfe, nyô baa, a nga tôñe nye, a jô'ô na, Beta Babilôn a kuya, nyô a nga bo meyoñ mese na, me nyu wain ya ayaa ya mejiane mé.

9 Ane éngle mfe, nyô lale, a nga tôñe balé bete, a jô'ô a beta tyiñe na, Nge mô't éziñ a kañ ñyôyo'o tit a éyeka'a jé, a nge a nyoñ ndeme jé e mvon asu jé, nge e wo wé, 10 mô't ate fe a ye nyu wain ya ayo'o Zambe, nyô a sôébaneya élaé ya ayaa dé, te nsamelan ; a ye fe ju'u mintaé e nduan a sufre été asu mimfufub beéngel, a asu Mone Ntômba. 11 Nde ôtita ya mbia mintaé wop vi abet nnôm éto a nnôm éto. Be nji bi awo'an môse baa alu, ba b'akañ ñyôyo'o tit a éyeka'a jé, nge nyô a nyoñ ndem ya

jôé dé. 12 E jame dina nde e ne mbane njiban mimfufub, ba b'aba'ale mebendé me Zambe, a mbunan b'abuni Yésus.

13 Ane me nga wô'ô tyiñ é so'o yôb été, é jô'ô na, Tili'i na, Ataté éyoñe ji miñwuan mi awu e be Nti, mmie mi ne ébotan. Yaa, Nsisim w'ajô nalé, nde ete b'aye wo'an mfa'a ya minju'u bisaé miap ; amu na, mimboane miap mi atôñe be samba.

Nkôane bidi ya si nyô

(Yes 63 :1-6 ; Yôél 3 :12-14 ; Mat 13 :37-43)

14 Ane me nga yen, a ô lôô, éfumulu nkut, a mô't éziñ a funa'ane mone mô't a too si e nkute yôp, a be'e ékate gôlt e nlô wé yôp, a bili mvitan akap fa e wo wé été. 15 Ane éngele mfe a nga a kui atan, a so'o e tempel, a yôta'ane nyô a too si e nkute yôp, a beta tyiñe na, Kelee mvitan akap fa wôé, ô sep bidi e mefup, amu awolo ya seb bidi e kpwaaneya, bidi ya kôan e si nyô bi nto bitôtôlô. 16 Nde nyô a nga too si e nkute yôp, a nga wua mvitan akap fa wé e si nyô, a bidi ya si nyô bi nga seban.

17 Ane éngele mfe a nga kui atan, a so'o e tempel a ne e yôb été, nnye fe a bili mvitan akap fa. 18 Nde éngele mfe a nga kui atan, a so'o altar, nnye a bili ngulenjôan ya jôô nduan ; ane a nga yôtane nyô a bili mvitane akap fa, a beta tyiñ, a jô'ô na, Kelee mvitan akap fa wôé, a tyi'i bisañe bibuma ya ndi'i ô ne e si nyô, amu bisañ ya été bi nto bitôtôlô. 19 Ane éngel a nga wua mvitan akap fa e si nyô, a tyi'i bisañe bibuma ya ndi'i ô ne e si nyô ; ane a nga wua bisañ ya été ébé ya étya'a wain, ji ya beta ayaa Zambe. 20 Ane wain a nga tya'aban a mebo e ébé été e nlam atan, a metyi me nga kui, me so'o e ébé étya'a wain, a yandan nté ane bityé b'awonane bikabela e menyu, me kele fe nté ya stadia toyini wua a mintete misaman.

Beéngel be bili susu'a bibubua zañbwaa

(Nkôl 15:1; Nkul 16; 19:1-4)

Rev. Matthias
Secrétaire Général

15 1 Ane me nga yen ndeme fe e yôb été, é too anen a jôm ya semé, na beéngéle zañbwal be bili susu'a bibubua zañbwaa; amu na, ayaa Zambe d'aman a bie.

2 Ane me nga yene jôm aval ane nge mañ me éyen, mfula'ane a nduan ; nalé fe ba be nga dañ ñyôyo'o tit a éyeka'a jé a tañ ya jôé dé, be tele ézezañe mañ me éyen, be bili memvete me Zambe e mo map. 3 Nde b'ayia jia Môze, mboésaé Zambe, a jia Mone Ntômba, be jô'ô na,

Mimboane miôé mi ne anen a mi ya semé,

A nti Zambe, Nyô a ne ngul ése !

Mezene môé me ne zôsôô a bebela,

4 Za a ye bo te ko woñ a wumulu jôé dôé,

A Nti !

Amu wo étam ô ne étyi.

Meyoñ mese m'aye zu a kañe wo,

Amu mintyi'ane miôé mi maneya kuliban.

5 Nde, éyoñ mam mete me maneya, ane me nga yene na, tempel ya tabernakela nkañete a ne e yôb été a nga diiban, 6 a beéngéle zañbwal be bili bibubua bite zañbwal be nga kui atan, be so'o e tempel, be be'e mengômesan me ndombo éfumulu a mfuban, be too fe ntiñetan mesese me gôlt e minkuk. 7 Nde wua ya bevevee be biôm benyin a nga ve beéngéle zañbwal bête bido'o bisua bi gôlt zañbwaa, bi too njalan a ayaa Zambe, nyô a vee nnôm éto a nnôm éto ; 8 a vôm ya tempel a nga jaé a ôtita vi aso étôto'o Zambe a éwôlô jé, a teke'e mô't a mbe ngul ya nyiin e tempel ate été, ve akekui bibubua zañbwal ya beéngéle bete zañbwaa bi maneya boban.

Rev. Matthias
Secrétaire Général

Bido'o bisua bi ayaa

(Nkô 7 akui 10 ; Nkul 8 :6-13 ; 9 ; 15)

16 1 Ane me nga wô'ô beta tyiñ a so'o e tempel été, a jô'ô bengele zañbwale na, Kelan, mi sôé bido'o bisua bi ayaa Zambe e si nyô.

2 Ane éngel ya ôsu a nga kôlô a sôé édo'o ésua jé e si nyô : a mbia fôl a nga bo e be bôt be nga be'e ntenane ndem ñyôyo'o tit, ba be nga kañ éyeka'a jé.

3 Nde nyô baa a nga sôé édo'o ésua jé e mañ, a me nga bo metyi metyi aval ane ma me mbime môl ; a vevea jôm ase ya biôm bi nga too e mañ été a nga wu.

5 Nde nyô lale a nga sôé édo'o ésua jé e mebôndôñe mendim, a me nga bo metyi metyi. 5 Ane me nga wôk ane éngela mendim a jô'ô na,

O ne zôsôô, A wo ô too, nyô a nga too, nyô a ne mfuban,

Amu ô tyi'iya ajô ana:

6 amu ba be nga sôé metyi mimfufub a ma bekulumejô,

nde ô veyá be de metyi na, be nyu,

B'ayiane nalé.

7 Ane me nga wô'ô altar a jô'ô na,

Yaa, A Nti Zambe, nyô a ne ngul ése!

Mintyi'ane miôé me ne bebela a zôsôô.

8 Nde éngela nyini a nga sôé édo'o ésua jé e jôp, a e nga veban e be de na, e di'i bôt e menyôl a nduan. 9 Ane bôt be nga di'iban a mbia ényan, a be nga yo'é jôé Zambe, nyô a bili ngul ya jôô bibubua bite. Ve be nga bo te kôñelane minlem a ve nye duma.

10 Nde éngela tane a nga sôé édo'o ésua jé éto njôô ñyôyo'o tit; a éjôé jé é nga bo dibi. Ane be nga nyalé ayeme dab amu mintáé, 11 a be nga yo'é Zambe ya yôb amu mintáé miap, a amu mefôle map. Ve be nga bo te kôñelane minlem a jô'é mimboane miap.

12 Nde éngela samane a nga sôé édo'o ésua jé e beta ôsôé, ôsôé Efratus, a mendim ya été me nga vele, ane zene bejô bôt b'aso mfa'a jôp d'atôô j'aye bo

nkôman. 13 Ane me nga yene mimvimvine minsisime mila, mi too aval ane minkongo, mi so'o anyu dragon, anyu ñyôyo'o tit, a anyu nkulumejô a ne minsos; 14 amu mi ne mi mi mbia minsisim, mi bo'o mendem, ane mi nga kôlô e si a ke e be bejô bôt ya si ése vôm ase, ane mi aye sulane be mfa'a bita ya beta môse Zambe, nyô a ne ngul ése.

15 O lôô, m'azu ane ñwuwup. Môt a mombô a ba'ale mengômesane mé, a za wulu soé ane b'aye yen ôsone vié, nnye a ne ébotan. 16 Nde minsisime mite mi nga sulane be e vôm a looban nkobô Hébru na, Harmagédon.

17 Ane éngela zañbwale a nga sôé édo'o ésua jé e ñyem, a beta tyiñ a nga kui atan, a so'o éto njôô é ne tempel été, a jô'ô na, E bobaneya ! 18 Nde befeleves, a metyiñ, a mindum mi mveñ bi nga bo ; a beta mfô'ôsane si a nga boban, abim mfô'ôsane e nji tame boban, ataté ane bôt be nga taté tabe e si nyô, aka'a beta mfô'ôsane si ete. 19 Ane beta nlam a nga salé bifase bila, a minlam ya meyoñe mefe mi nga ku. Nde Zambe a nga simesan beta Babilôn, ane a ye ve nye a nyu élaé wain ya ayaa dé. 20 Ane ékôte mañ ése é nga mate, a beta minkôl mi nga bo te beta yené ; 21 a beta meta'a, ébañe jia adit ane atyi étyé a ne ntete talent, me nga ku bôte yôp, me so'o e yôp. Ane be nga yo'é Zambe amu ébubua ya meta'a mete, amu ébubua ya été é mbe étua angônda jam.

Ntyi'an ajô beta minga bijabô

(Nkul 18; 19:11-21)

17 1 Ane éngele wua ya beéngéle zañbwaa be nga bili bido'o bisua zañbwaa, a nga zu, a kobô ma, a jô'ô na, Za'ak, m'aye liti wo ntyi'an be tyi'ya ajô beta minga bijabô, nyô a nga too e si abui mendime yôp. 2 Nyô baa be bejô bôt ya si be nga bo mejjan, a bôt be too e si nyô be nga sok amu wain ya mejiane mé. 3 Ane a nga kee ma e fé e Nsisim été. Nde me nga yene minga, a too si e ñyôyo'o tite yôp, ô too évele, nyôl njalan a môé me ébiasé Zambe, ô bili fe minlô zañbwal a minla'a wôm. 4 A minga ate a nga be'e ngômesan é too ékukut a évele, a too fe nkômesan a biôm bijañ bi too gôlt a bidima mekok, a metabe. A bili élaé gôlt e wo wé été, é too njalan a

mbia be biôm a mvine mam ya mejiane mé. 5 A bili fe jôé ntilan e mvom asu jé, e too nsolane jam, na, Beta Babilôn, Nyia bebijabôô, a nyôa mbia be biôm ya si nyô. 6 Ane me nga yene minga ate a so'o metyi mimfufub a metyi bengaa be Yésus.

Nde, éyoñ me nga yene nye, me nga kam beta nkaman. 7 Ane éngel a nga jô me na, W'akam amu jé? Ma m'aye kate wo nsolane jam ya minga ate, a wu ya ñyôyo'o titi ô be'e nye, wu ô bili minlô zañbwal a minla'a awôm. 8 Nyôyo'o tit w'ate yen le, ô nga too, a ô nto momo, a ô ye'e bet, ô so'o e febebee édo'o ébé été, a ô kôlô'ô a ke e njañan. A ba be too e si nyô, ba môé map me nji bo ntilan e kalate ényiñ été aso mbô'an ya si nyô, b'aye kam éyoñ b'ayen ñyôyo'o tit ôte na, ô nga too, a ô nto momo, a w'aye beta yéné. 9 Jame di nde e ne fek a ñyemane mam; minlô zañbwal mi ne beta minkôle zañbwaa, mmie minga ate a too yôp. 10 Mi ne fo'o bejô bôt zañbwaa, betan ya été be maneye ku, wua nnye a nto, nyô mbo'o a ngenan te zu. Nde éyoñ a ye zu, a yiane tabe ôyôme nté. 11 Nde ñyôyo'o tite ya ô nga too, a ô nto momo, ôbiene fe ô ne njô bôt muame, ô too fe môte wua ya bôte zañbwale bete, nde a ye kôlô a ke e njañan. 12 A minla'a awôm w'ate yene le, mi ne bejô bôt awôm, mmbe be ngenan te nyoñ éjôé ;ve be ye'e nyoñ ngulenjôan aval ane bejô bôt, nté ya awolo da, ba be ñyôyo'o tit ôte. 13 Balé bete be ne ôsimesane via, a b'ave ñyôyo'o tit ngule jab a ngulenjôane jap. 14 Balé bete b'aye kui Mone Ntômba bita, a Mone Ntômba a ye dañe be, amu a ne Nti ya beti, a Njôô ya bejôô; a ba be ne nsamba wé be ne nloen, a mintoban, a ba ya buni; b'aye fe dañe be.

15 Ane a nga jô me na, Mendim w'ate yene le, vôm minga bijabô a too si, me ne menyôñ, a bizu'u bi bôt, a menda me bôt, a minkobô. 16 Nde minla'a awôm w'ate yen le, ba be ñyôyo'o tit ôte, b'aye siñe minga bijabô, b'aye samele nye a télé nye sôé; b'aye fe di minsôn mié, a di'i nye nduan. 17 Amu Zambe a veye be nlem ya ôyili via na be ve ñyôyo'o tit éjôé jap, akekui mejô me Zambe m'aye tôéban. 18 Nde minga w'ate yene le, a ne beta nlam ate, nnye a bili éjôé ya jôô bejô bôt be ne e si nyô.

Rev. Matthias
Secrétaire Général

Nkuane Babilôn

(Yes 13 :17 ; Yér 50 ; 51 ; Nkul 17 :1-6)

18 1 Eyoñ mam mete me maneya, me nga yen éngele mfe, a sisik, a so'o e yôb été, a bili beta ngulenjôan; a si é nga faé amu étôto'o jé. 2 Ane a nga yôtan a beta tyiñ, a jô'ô na,

Beta Babilôn a kuya, a kuya !

A boya fe étaba'a mbia nsisim, a nda mimbô'ô mvimvin nsisim ôse,

A nda mimbô'ô ônon ôse ô ne te mfuban bôt b'avini.

3 Amu na, meyoñ mese me nyuya wain ayaa ya mejiane mé ;

Nalé fe bejô bôt ya si nyô be nga bo mejian a nye,

a bekuan abom ya si nyô be nga bo kum amu mbia bisô'ô bié.

4 Ane me nga wô'ô tyiñe fe, é so'o e yôb été, é jô'ô na,

A bôte bam, kôla'an e be nye ane mi aye bo te bo benyoñ ngabe ya

mam abé mé, a na, mi bo te nyoñ ngabe ya bibubua bié.

5 Amu na, mam abé mé me boya avis e kuiya e yôb été,

a Zambe a simesaneya bikotekote bié.

6 Abim a nga wumulu émien, a bo mbia bisôk,

Abim ete fe va'ane nye ényan a ñyiane du.

Amu a jô e nlem été na,

Me too si ane njô bôta minga ; me nji bo nkus,

a m'aye bo teke'e yem ñyiane du.

8 Amu môse wuwua , ñwô bibubua bié bi aye kui:

awu, a ñyiane du, a mfumbala zaé, nde a ye di'iban a nduan.

Amu Nti Zambe, nyô a tyi' ajô dé, a ne éwôlô.

9 Nde bejô bôt ya si nyô, ba be nga bo mejian a nye, a bo mbia bisôk, b'aye yi du a yône nye, éyoñ b'ayen ôtita ya ndi'ane wé, 10 be tele ôyab amu woñe ya mbia mintae wé, be jô'ô na,

Ngo'o ! Ngo'o nye, beta nlam ate ! Babilôn, beta nlam!

Amu awolo dada nde ntyi'an ajô wôé ô kuiya.

11 Bekuan abom ya si nyô be nga yi fe du a yône nye amu na, môt a nji fe beta kus akume dap; 12 akum gôlt, a di silba, a di bidima mekok, a metabe, a nya ndomboo, a ngômesan é ne ékukut, a nyô silik, a nyô é ne évele, a akum ya aval élé ése e ne mbamba menyum, a jôm ése é ne mboan a mbañ, a jôm ése é ne édima, a ji ya mvot, a ji ya étyé, a ji ya ako'o marbre, 13 a bityita'a ane sinnamon, a amôn, a mbone mbamba menyum, mira a wain, a mbon ôlivié, a nte'an avut, a blé, a betite mimbe'e, a mintômba, a bikela, a bewagon bita, a belo be ne binyiñe bi bôt. 14 Nde bibuma ya nleme wôé ô nga bo ô nyamete'e, bi kôlôya e be wo, a biôm bise bi ne éto bitek a bi bi angemban, bi jañeya mfa'a wôé. Bôte b'aye ke bete yene bie. 15 Nde bekuane bisa bite, ba be nga bo kum amu nye, b'aye tebe ôyab amu woñ ya mbia mintaé wé, be yi du a yôn, 16 a jô na,

Ngo'o, ngo'o, beta nlam ate!

Nyô a nga be'e nya ndomboo, a too fe nkômesan a biôm bijañ bi too Gôlt,

A bi ya bidima mekok a metabe.

17 Amu na, awolo dada nde aka'a beta akum ete e boya ne sangaññ. Nde nlitimiele zen ase, a nyô ase a ke vôm éziñ e miel été, a bewulumiel, a abime bôt d'abo ésaé e mañ, be nga tebe ôyap, 18 a yôtan, éyoñ be nga yen ôtita ya ndi'ane wé, be jô'ô na, Nlam mbé w'afunan ane beta nlam ate? 19 Ane be nga kute mbulu'u e minlô, a yôtan, be yiik a yôn, be jô'ô na,

Ngo'o, ngo'o beta nlam ate!

Nne ba bese be nga bili bifunga,

e ézezañe mañ be nga bo kum été amu afo'o dé,

Amu na, awolo dada nde a boya ne sangaññ.

20 A yôb, bo'o mefôn,

A mia mimfufub, minlôman a bekulumejô,

Amu Zambe a kuneya mia e be nye.

21 Ane éwôlô éngel é nga to'é akok, e too beta ako'o b'ako'o nye bidi, ane a nga wua de e mañ été, a jô na,

Rev. Matthias
Secrétaire Général

Nalé, Babilôn, beta nlam ate

a ye wuaban a évô,

a bo te beta yené;

22 Nde tyiñ bebôme memvet a nyô ya beyia bia,

a beloñe mendiñ, a beloñe toñ, j'aye ke beta wô'é e be wo;

a teke'e ntyetyeñ w'abo ésaé atyeñ,

w'aye beta yené e be wo;

Eduñe beta ako'o b'ako'o bidi, j'aye ke beta wô'é e be wo.

23 Nalé fe éfufube lambe,

j'aye ke beta faé e be wo;

A tyiñe nlu'u minga nge mbom,

j'aye ke beta wô'é e be wo.

Amu na, bekuan abome bôé be mbe benya bômvaa ya si nyô,

amu meyoñe mese me nga du'uban amu mboan bemvi'i wôé.

24 E be wo, metyi bekulumejô a ma mimfufub me nga yené,

nalé fe ma ya ba bese be nga wôéban e si nyô.

19 1 Eyoñ mam mete me maneya, ane me nga wô'ô tyiñ aval ane nge ngungule tyiñe beta ézu'u bôt e yôb été, é jô'ô na,

Alléluia!

Nyian, a duma, a éwôlô, bi ne jôme Zambe wongan,

2 Amu na, mintyi'ane mejô mié mi ne bebela a zôsôô;

amu na, a tyi'iya ajô beta minga bijabô,

nyô a nga bo a ndama'ane si nyô a mejiane mé;

A kuneya fe metyi bebobisaé bé e be nye.

3 Ane be nga jô ajô baa na,

Rev. Matthias
Secrétaire Général

Allélua!

Nde ôtita vié vi abet akekui nnôm éto a nnôm éto.

4 Ane bemvendé mewôm mebaé a benyin, a bevevee be biôm benyin, be nga buti mesu e si a kañe Zambe, nyô a too si éto njôô, be jô'ô na,

Amen, Allélua!

5 Ane tyiñ é nga so éto njôô, é jô'ô na,

Se'ane Zambe wongan,

A mia bebobisaé bé bese,

ba b'ako nye woñ,

ba betok ba bennen.

6 Ane me nga wô'ô aval ane nge tyiñe beta ézu'u bôt, aval ane nge éduñ abui mesôk, a aval ane nge éduñ biwôlô mindum mi mveñ, é jô'ô na,

Allélua!

Amu Nti a jôô,

Nyô a ne Zambe wongan, a ne ngul ése.

7 Mva'an a fôn,

a ve nye дума dé,

amu alu'u Mone Ntômba e kpwaaneya,

a minga wé a maneya kômesan.

8 Ane e nga veban e be nye na,

a jaé nya ndomboo a bulu fum, a too mfuban,

Amu nya ndomboo ate a ne bezôsôô mimboane mimfufub.

9 Ane a nga jô me na, Tili'i na, Mvom a ba be ne mbañetane na, be tabe ésulane bidi ya alu'u Mone Ntômba. Ane a nga jô me na, Bebebela mejô ba, be ne mejô me Zambe. 10 Ane me nga buti asu e si e mebo mé si na, me kañe nye. Ane a nga jô me na, Tabe'e ntye ! Me ne ébe mboésaé wôé, a nyôa bobenyoñ be bili nkañete ajô Yésus. Kañe Zambe ! Amu nkañete ajô Yésus ñwô ô ne nsisime nkulane mejô.

Nwulu éfumulu ékabela

(Besam 45 :4-8 ; Yes 11 :4 ; 24 :21, 22 ; 63 :1-6 ; 2 Tés 2 :8 ;

Yuda 15 ; Nkul 16 :13-16 ; 17 :13, 14)

11 Ane me nga yene yôb e too nkandan, a ô lôô, éfumulu ékabela, a nyô a nga too je yôp, a loobane na, Nyô ya buni a bebelaa; nde a tyi'i mejô a bo bita e zôsôô été.

12 Mise mé me ne nkaba'a nduan, a be'e fe bibeba'a bi éjôé abui e nlô wé yôp. A bili jôé ntilan, di e ne teke'e mô't a yeme de ve émien; 13 a be'e fe mengômesan me too ndubane metyi metyi ; a jôé dé d'aloobane na, Mejô me Zambe. 14 Minsamba mewosan mi ne e yôb été mi nga tôñe nye, mi too e bifumulu bikabela yôp, mi be'e nya ndomboo a bulu fum, a too fe mfuban. 15 Nde akabe fansoñ e nga bo e kuik anyu dé, ane a ye bibi de meyoñ. Nnye a ye jôô me a ntum étyé, a a ye tya'a wain ébé ayo'o Zambe été, nyô a ne ngul ése. 16 A bili fe jôé ntilan e ngômesane jé yôb, a abé dé yôp, e too na, Njôa bejôô, Ntia beti.

17 Ane me nga yen éngele wua a tele e jôb été, nde a nga yôtan a beta tyiñ, a jô anon ese d'aye e ézezañe ñyeme yôbe na, Zaka sulan e beta ésulane bidia Zambe, 18 ane mi aye di minsône bejô bôt, a minsône bivete bezimbi, a minsône biwôlô bi bôt, a minsône bikabela, a minsône bewulu bikabela, a ba be ne belo, ba betok a ba bennen.

19 Ane me nga yen ñyôyo'o tit a bejô bôt ya si nyô, a minsamba mewosane mié. 20 Ane ñyôyo'o tit ô nga bili, nalé fe nkulumejô a ne minsos, nyô a nga bo mendem e mise mé, mme a nga yale bôt zene fe, ba be nga nyoñ ntenan ndeme ñyôyo'o tit, nalé fe ba be nga kañ éyeka'a jé. Be bebaane be nga wuaban ato'o nduan d'ayôñ a sufre, be too bevevee; 21 a ba bevo'o be nga wôéban a fansoñ é nga kui anyu nyô a nga too ékabela yôp. Nde anon ése e nga jaé a minsône miap.

Toyina mimbu

(Yes 2:2-4; 11: 6-10; 65:16-25; Dan 7:22-27; Nkul 5:9, 10)

20 1 Ane me nga yen éngel a sisisk, a so'o e yôb été, a bili ôdiba'a ya febebee édo'o ébé, a beta ngôkob e wo wé été. 2 Ane a nga bi dragon, nnôm nyo ôte, ñwô ô

ne Diable a Satan; Ane a nga ka'a nye ngata'a ya nté mimbu toyini wua. 3 Ane a nga wua nye e febebee édo'o ébé été, a dibe je, akekui toyina mimbu ate a kpwaaneya. Mvus éte a yiane tiiban mon nté.

4 Ane me nga yene bito bejôô, a ba be nga too bie e yôp, a ngul ya tyi'i mejô é nga veban e be be. Me nga yene fe ba be nga tyi'ibane minlô amu nkañetan ajô Yésus, a amu mejô me Zambe; nalé fe ba be nga bo te kañ ñyôyo'o tit, nge éyeka'a jé, nge nyoñ ntenan ndeme wé e mvom mesu, nge e mo map. Ane be nga beta veebe, a bo bejôô, baa be Krist, toyina mimbu. Miñwuan mivo'o mi nga bo te beta veebe, ve akekui toyina mimbu ate a lôteya. Nwômane miñwuan ya ôsu le. 6 Mvom a mfufub a mô't a bili ngab e ñwômane miñwuan ya ôsu ôte. Balé bete, awu baa e nji bi ngul ya bo be jam, ve b'aye bo bepretre be Zambe, a ba be Krist, a b'aye bo bejôô, baa be nye, toyina mimbu.

7 Nde éyoñ toyina mimbu ate a ye mane lot, Satan a ye tiiban, a kôlô e nda mimbô'ô jé; 8 a ye du'u meyoñ me too e meku'u menyin ya si nyô, Gôg baa Magôg, ane a ye sulane be amu bita; tañe jab é ne aval ane nsel'e ya mañ. 9 Ane be nga bet, be yi'ane ndame si, a bômane minkane mimfufub a nlam bi anye'e. Ane nduan é nga sis, é so'o e yôb été, a mane tume be. 10 Nde diable, nyô a nga du'u be, a nga wuaban ato'o nduan a sufre été, vôm ate ñyôyo'o tit baa nkulumejô a ne minsos be né; a b'aye ju'u mbia mintaé môse baa alu akui nnôm éto.

Ntyi'ane mejô asu éfumulu éto njôô

(Mat 13:38-43; 25: 31-46; Yôh 5:26-29; M.M. 17:30, 31; 2 Kor 5:10; 2 Pét 3:7-12)

11 Ane me nga yene beta éfumulu éto njôô, a nyô a nga too je yôp; asu dé nde si baa yôp be nga mate, a vôm be ne tabe a nji fe yené. 12 Ane me nga yene miñwuan, mi minnen a mi mitok, mi tele asu éto njôô, a bekalate be nga kuuiban. Nde kalate mfe a nga kuuiban, nnye a ane nyôa ényiñ; a miñwuan mi nga tyi'ibane mejô amu mam me mbe ntilan e bekalate bête été, aval ane mimboane miap mi mbe. 13 Mañ me nga kuli miñwuan mi nga too me été, a awu baa Hadés be nga kuli miñwuan mi nga too bie été; ane mi nga tyi'ibane mejô, mô't ase aval ane mimboane mié mi mbe. 14 Nde awu baa Hadés be nga wuaban ato'o nduan été. Awu baa, nde le, e ne na,

ato'o nduan. 15 Nge mô't éziñ a nji yené ntilan e kalata ényiñ été, wôna a nga wuaban ato'o nduan été.

Mfefé yôb a mfefé si

(Yes 65 :17-19 ; Rôm 8 :17, 18 ; 2 Pét 3 :13, 14 ; Nkul 7 :13-17 ; 19 :7-9)

21 1 Ane me nga yen mfefé yôb a mfefé si ; amu na yôb ya ôsu a si ya ôsu bi lôteya, a mañ me nji fe bo. 2 Ane me nga yen mfufube nlam, mfefé Yérusalem, ô sisik, ô so'o e yôb été e be Zambe, ô too nkômesan abeñ aval ane mbom mfa'a ya nnôme wé. 3 Ane me nga wô'ô beta tyiñ, a so'o éto njôô, a jô'ô na, O lôô, tabernakela Zambe a nto e be bôt ; a ye tabe e be be ; be fe b'aye bo bôte bé, a Zambe émien a ye tabe e be be [a bo Zambe wop] , 4 a ye fimi mili'i mese e mise map. Awu d'aye fe bo ; nalé fe ñyiane du, nge ñyôtan, nge mintaé, bi aye fe beta bo, amu mam ya ôsu me lôteya.

5 Ane nyô a nga too éto njôô yôb a nga jô na, O lôô, m'abo mam mese mimfefé. Nde a nga jô na, Tili'i, amu na, mejô mete me ne ma ya buni a bebela. 6 Ane a nga jô me na, E bobaneya ! Me ne Alfa a Oméga, atata'a a susu'a. Ma m'aye bo nyô a wô'ô évé na, a nyu anjeñe mendim me ényiñ, e zesé. 7 Mô't a dañ, a ye nyoñe mam mese ane ngabe jé ; m'aye fe bo Zambe wé, a nye a ye bo mone wom. 8 Ve mfa'a miñwôwoñ, a ba b'abene buni, a ba be boya bebien nyé, a bewôé bôt, a beke mangan, a mimvivi'i, a bekañe biyeñeyeña bi biôm, a belaa minsose bese, ngabe jab é ne ato'o d'ayôñe nduan a sufre été, nde e ne awu baa.

Mfefé Yérusalem

(Yes 60 ; Ezék 40 :2 ; 48 :30-35 ; Behéb 11 :10, 16)

9 Ane éngele wua ya beéngel zañbwal be nga bili bido'o bisua zañbwaa, bi too njalan a susu'a bibubua zañbwaa, a nga zu, a kobô ma, a jô'ô na, Za'a nne, m'aye liti wo mbom, nga Mone Ntômba. 10 Nde a nga kee ma e Nsisim été, akui e beta nkôl, a too anen a ôyabe yôp, ane a nga liti ma mfufube nlam, Yérusalem, ô sisik, ô so'o e yôb été e be Zambe, 11 ô bili étôto'o Zambe. Efufub ya été é nga funan ane ako'o d'adañ édima, aval ane ako'o yaspé d'angemban ane Kristal. 12 Nlam ô nga bili aka'a mekok, anen a ôyab e yôp. Mimbé mi nlam mi mbe awôm a mibaé, nde beéngel awôm a bebaé be nga tele e mimfôm mimbé mite; môé me too fe ntilan e mimbé yôp, mme me ne môé meyoñ me bone be Israe l awôm a mebaé. 13 Mimbé mi mbe milal mfa'a ya nsak, milal mfa'a ya akôé, milal mfa'a ya nké, a milal mfa'a ya so. 14 Nde aka'a ya nname nga bili mimbôka'a awôm a mibaé, môé minlôman mi Mone Ntômba awôm a mibaé me too ntilan été yôp.

15 Nde nyô a nga bo a kobô'ô ma, a nga bili ôlé gôlt, ane a ye ve'e wô nlam a mimbé ya été. 16 Nlam ô mbee meku'u menyin nté wua, a nté a ndam ya été avale da. Nde a nga ve'e nlam a ôlé, ô too nté stadia toyini awôma ébaé; nté a ndam ya été, a nkôñe fe ve nté wua. 17 Ane a nga ve'e aka'a ya été, menyii me mo ntet, mewôm menyin a menyin, mve'ane mô't a ne ve'e de, e ne na, mve'an éngel. 18 Nlôñan aka'a ya été ô ne ako'o yaspé; ve nlam ô mbe nlôñan a mfubane gôtl, w'afunan ane mfuban élaé; 19 mimbôka'a mi aka'a ya nlam mi too nkômesan a aval ako'o ese e ne édima. Mbôka'a ya ôsu ô mbe ako'o yaspé; wu baa, di safir; wu lale, kalkédôn; wu nyini, émarôd; 20 wu tane, sardôniks; wu samane, sardôan; wu zañbwale, krisôlit; wu muame, béril; wu ébulu, topaz; wu awômô, krisôpras; wu awôm a wua, hiakint; wu awôm a baa, ametist. 21 Nde mimbé ya nlam awôm a mibaé mi mbe metabé awôm a mebaé, mbé ôse ya mimbé misese'e ô mbe atabé da; nseñ ya nlam ô mbe mfubane gôlt, aval ane élaé j'angemban.

22 Nde me nji yene temple été; amu na, Nti Zambe, nyô a ne ngul ése, nnye a ne tempel été, nalé fe Mone Ntômba. 23 Nlam ô ne te yi jôp, nge ngone na, bi faé wô, amu étôto'o Zambe é nga ve wô éfufup, a Mone Ntômba, nnye a ne lambe ya été. 24 Nde meyoñ m'aye wulu amu éfufub ya été, a bejô bôt ya si nyô b'aye zuu étôto'o jab été. 15 Mimbé ya nlam mi aye bo teke'e diban a môs, amu alu d'aye bo momo wôé. 26 B'aye fe zuu étôtok a ôlu'u ya meyoñ e nlam été, 27 a jôm é ne te mfuban j'aye ke nyiin été, nge mboo mbia be mam, nge nlaa minsos ; ve ba étam be ne ntilan e kalata ényia Mone Ntômba été.

22 1 Ane éngel a nga liti ma ôsôé mendim m'ényia, ô ngemba'an aval ane ako'o kristal, ô so'o éto njôô Zambe, a ji Mone Ntômba. 2 E tem nseñ ya nlam, a mfôm ôsôé e kindi'i ya nne, a mfôm ôsôé kindi'i ya yat, élé ényia e nga tele, é wumu' bibuma awôm a bibaé, é va'a bibuma bié ngon ane ngon ; a mekaé ya été me ne jôm ya saé je meyoñ. 3 Nalé fe biyo'é bi aye beta bo. Eto njôô Zambe a ji Mone Ntômba bi aye bo wô été, a bebobisaé bé b'aye saéane nye; 4 b'aye yene fe asu dé, a jôé dé d'aye bo ntilan e mvom mesu jap. 5 Alu d'aye ke beta bo, nalé fe b'aye bo te yi éfufube lambe, nge éfufube jôp, amu na, Nti Zambe a ye faé be éfufup, a b'aye bo bejôô akekui nnôm éto a nnôm éto.

Nsoane Yésus

(Mat 16 :27 ; Gal 6 :7, 8 ; Nkul 1 :1-3, 7, 8)

6 Nde éngel a nga jô me na, Mejô mana me ne ma ya buni a bebela. Nti, Zambe minsisime bekulumejô, a nga lôme fe éngele wé na, a liti bebobisaé bé mam m'ayiane ji'a boban. 7 (Yésus na) : O lôô, me mbeme zu. Mvom a mô't a ba'ale mejô ya kalate nyô.

8 Nde ma Yôhanes, me ne nyô a nga wô'ô a yene mam mana, a éyoñ me nga wô'ô a yene me, me nga buti asu e si na, me kañe nye. 9 Nde a nga jô me na ; Tabe'e ntye ! Me ne ébe mboésaé wôé a nyôa bebenyoñ bekulumejô, a nyôa ba b'aba'ale mejô ya kalate nyô. Kañe' Zambe. 10 Ane a nga jô me na, Te fete mejô ya nkulane mejô ya kalate nyô, amu éyoñ é nto bebé. 11 Môt a ne ékotekot, a bo'o zôsôô ; a mô't a ne mfufub, a bo'o mfufub.

12 (Yésus na) : O lôô, me mbeme zu, a meya'an mam me ne e be ma na, me ya'ane mô't ase aval ane mboane wé ô né. 13 Ma me ne Alfa a Oméga, nyô ôsusua a nyôa mvua, atata'a a susu'a.

14 Mvom a ba b'asôb ayabe melô'ô dab ane b'aye bi ngul ya di élé ya ényiñ, a tulane mimbé ya nlam, a nyiin été. 15 Bemvu be ne wô atan, nalé fe mimvimvi'i, a beke mangan, a bewôé bôt, a bekañe binyeñeyeña bi biôm, a mô't ase a nye'e minsos, a bo'o fe mie.

16 Ma Yésus me nga lôm éngele wom, ane a ye bo ngaa ya mam mana mfa'a bekirke. Ma me ne ndi David, a mvoñe bôte jé. Me ne ôteté vi afaé melendé me tyé.

17 Nde Nsisim baa mbom b'ajô na, Za'ak. Nalé fe mô't a wôk, a jô'ô na, Za'ak. Nde mô't a wô'ô évé, a za'ak. Mô't a kombô, a nyoñe' mendim m'ényiñ, e zesé.

18 Ma Yôhanes m'akañete nyô ase a wô'ô mejô ya nkulane mejô ya kalate nyôna na, Nge mô't éziñ a beté jôme yôb e be mejô mana Zambe a ye beté bibubua bi ne ntilan e kalate nyôna été e be mô't ate. 19 Nalé fe, nge mô't éziñ a vaa jôm e mejô ya kalata nkulane mejô nyôna été, Zambe a ye vaa ngabe jé élé ya ényiñ a mfufube nlam été, mbie bi ne ntilan e kalate nyôna été.

20 Mô't a ne ngaa ya mam mana a jô na, Yaa! Me mbeme zu. Amen, A Nti Yésus, za'ak.

21 Mvam Nti Yésus é bo'o e be mia bese.

Rev. Matthias
Secrétaire Général